

欽定戶部漕運全書

欽定戶部漕運全書卷七十五目錄

採買搭運

採運麥豆

奉豆奉米

碾動薊穀

捐輸米石

採運麥豆

一乾隆三年因東省黑豆緩徵運通

豆石不敷

支放奉

旨令東豫二省動項採買運通支放

一乾隆四十三年四月欽奉

諭旨昨因京畿一帶麥苗望澤糧價稍昂降旨於五城設廠酌撥米麥平糶並傳諭弘晌等於盛京各屬採買麥石二三十萬由海道運至天津再行接運至京以供平糶之用但思奉天地方雖素係市糧充裕而

現在新糧尙未登場若一時採買過多恐該處糧價漸次加增於閭閻口食不無妨礙著再傳諭弘昫等祇須採買十萬石如該處市麥無多著採買五萬石如該處情形實有難辦卽不足五萬石亦可務期迅速由海道運至天津交周元理接運至京以供平糶弘昫等卽行督率妥辦仍將如何籌辦緣由先行迅速覆奏並一面知會周元理預備接運欽此嗣據直隸總督周元理咨明奉天此次麥石運至天津委員接運事宜應照歷年運通黑豆之例委天

津道總理並令該道委員眼同天津縣及奉天
委員交兌明白由天津縣另雇撥船裝運至通
其由通運京事宜應照乾隆二十四三十五等
年直隸委員接收轉運東麥之案委通永天津
二道總理並委通州理事通判通州知州在石
壩接收轉運至大通橋交卸其自大通橋運至
京城糶廠應委東路同知等會同辦理至斛隻
應用奉省委員帶來原斛與每年運通黑豆部
頒之斛較準兌收將交石到京應交各倉數目

聽候部派劄知總理之通永天津二道轉飭委員遵照運送其麥石由大通橋轉運京倉盤兌交廠亦應照二十四三十五等年成例委理事同知知州知縣等四員前赴通州聽候通永天津二道指示辦理其照料稽查應需佐雜亦應令通永道在所屬佐雜內就近酌派八員差遣幫辦又麥石起壩後由閘河運至大通橋用經紀撥船所需口袋腳價人夫飯食繩席並一切雜費銀兩在於司庫節年歸公平餘銀內動撥

乾隆四
十三年

一直隸總督將接運奉天運京麥石自津至通
各事宜酌議規條應開載於後

一奉麥運抵海口由大沽海河運至天津龍王
廟水次計程一百八十里俱係上水應飭天津
縣沿河多備緯夫飭委葛沽巡檢外委前往海
口駐候一俟海船進口卽督率緯夫每船加添
二十名趕緊拉運於三四日內運至龍王廟水
次以便兌撥

一海船至龍王廟即公同驗明麥色較準斛口
分配撥船卽令就船兌撥令海船戶具一總結
開明裝麥若干分給某船各若干再令撥船戶
遞具裝麥實數甘結以便查對至麥石船隻毋
論大小總以契水二尺爲度不宜過重

一兌交所需斛隻飭令津軍子牙二廳率同天
津縣眼同奉省委員將帶來斛隻公同較準印
烙十隻每斛一張日兌五百石十隻日計共兌
麥五千石先到奉麥一萬九千石約計四日全

數兌完其續到之麥亦照此辦理

一撥船裝完之後卽編列號數註明船戶姓名
裝麥石數造具總冊分起押運派佐雜四員分
船管押帶同天津縣書辦一名每船派幹役一
名挨順號次押令開行償運並委津軍同知子
牙河通判輪流督運

一麥色驗明卽行開兌先將麥樣包封呈送倉
場衙門查驗交兌時倘有潮濕短少等事眼同
奉天委員比對明白立即通詳著落賠補至內

河運通倘有稽查不嚴偷漏情弊著落直省各
委員分別賠補

一麥船抵壩仍照原斛原兌交倉場衙門兌收
兌竣後令各委員星卽馳回以便續運

一奉麥運通既經倉場奏明交倉場衙門兌收
轉運應請照運豆之例邀同奉省委員赴通公
同交兌倘有驗查等事免致彼此推諉

一撥麥船隻由津抵通經由北運計程三百二
十里今歲久旱水勢微弱淤淺較多必須晝夜

賃行方可迅速定例每百石祇報銷水腳銀四兩八錢若令船戶自行多雇縴夫輓運水腳自必不敷查北運河沿河州縣俱設有水驛向有額設驛夫令驛夫頭領驛夫在於交界處等候俟麥船到境大船加添驛夫四名小船加添驛夫三名幫同加緊輓拽逐程交替

一撥船運通沿途俱有關稅口岸倘未能辨識自必層層盤詰且恐別項民船夾雜影射每運給護照一張開列船隻人名數目並置旗子燈

籠俾口岸易於認放委員便於稽查所需置費
以及燭燭令天津縣於辦公銀內動用備辦

一麥船運通沿途如遇漕艘並行恐不許漫幫
前進咨明倉場並通州巡漕御史轉飭押運各
員不得攔阻

一麥船運通沿途如遇風雨暫行停泊務須齊
集收幫不許零星散住令委員官役並沿途營
汛在於停泊處所一體巡邏防護以免偷盜情
弊

一海船水脚既經

盛京將軍奏明直省給發飭令天津縣俟麥船到
津卽照運豆之例照數給發其內河撥船由津
運通所需水脚亦照運豆之例支給在於通庫
借項墊發事竣造冊報銷赴司請領歸款

一交兌押運胥役斗級人等所需盤費飯食在
於天津道按名捐給以杜弊端

以上十三款均
乾隆四十三年

一乾隆四十三年四月欽奉

諭旨前因京畿一帶麥苗待澤糧價稍昂降旨令五城

設廠平糶並傳諭弘晌等於各屬酌量採買麥石由海道運至天津接運到京以供平糶之用茲據弘晌等奏盛京本城祇可採買七千餘石其餘各屬俟查覆到日再酌定採買數目具奏等語盛京地方市糧雖素稱饒足而種麥者較少於各種糧米恐一時採買過多麥價或漸至騰貴且今年秋間尙須巡幸該處其間閭口食不可不令較爲充裕至京城平糶之用昨已諭令畢沅於常平餘麥內酌撥五萬石由河南水路轉運到京是各倉儲糶麥石可無需盛京多

撥著傳諭弘响等如採買不甚費力價值不致驟昂
卽購辦一二萬石運京若辦理稍覺竭蹶祇將現行
採買之七千餘石卽派員由海船運送一面知會周
元理委員接運送京欽此續據弘响等覆奏採買麥
石實無竭蹶價值亦不致驟昂酌量情形仍採
買五萬石或借運津豆石船隻或雇覓商船陸
續起運以資平糶之用六月奉

旨據周元理奏奉天運麥海船陸續進口者已有二十
隻約計共裝麥二萬餘石現已開兌過載星飛輓運

抵通其委員珠凌阿等自願照運豆之例前赴通州
眼同交兌等語此項麥石從海運進口甚屬迅速所
有奉天押運委員俟竣時該部帶領引見欽此

一乾隆四十三年六月欽奉

諭旨鄭大進奏陝西辦運麥石於五月十八日覈計已
運到五萬石此後踵至者當復不少現在酌議分撥
應行協濟之各州縣並將運到之麥先撥三萬石解
京派員分作首次兩運押抵通州其後二萬石作爲
第三運押送等語所辦甚好此項先運之麥三萬石

自應卽行解京以供平糶之用著傳諭周元理卽速
派員於交界處經理照料同豫省委員迅速押送通
州運京業據倉場侍郎奏請照向例由通惠河轉運
著該侍郎等於麥石運抵通州時卽行運解京倉以
期安速至前諭陝西辦麥五萬石盛京辦麥五萬石
運京供糶通計共有麥十萬石以之分撥京城各廠
尙可無需如許之多因思畿輔各屬今年麥收大率
歉薄而順德廣平大名三府尤甚亦應撥運麥石以
資接濟著傳諭周元理悉心籌畫於此十萬麥石內

酌撥二三萬石協濟各屬於貧民口食更爲有益其順德等府與豫省接壤者即可截留後運麥石分撥尤爲近便其餘各屬有應協濟者即可將盛京運到天津麥石覈計水次遠近酌撥周元理於酌定後一面具奏一面飛咨鄭大進照辦此旨著發往令該督等上緊籌辦並諭令倉場侍郎知之欽此續據直隸總督周元理覆奏陝西省運京麥石俟首次二運三萬石一入直境卽行飛速僸運前抵通州轉運進京外其後運麥二萬石擬於大名府屬

並清河故城各米次酌畱以濟大名廣平順德
正定等府屬供糶餘俟奉天麥石運抵天津除
轉運赴通外亦擬俟後運在於天津縣之北倉
酌畱一萬石以供保定天津河間等府平糶之

用

乾隆四
十三年

一乾隆四十四年正月欽奉

諭旨據畢沅奏籌辦運京麥石酌擬在附近水次之監
田涇陽等各地方撥常平倉儲並收捐監生麥五萬
石均勻搭載由渭入河分起押送銜尾前進仍在前

次交收之峽州會興頭地方令豫省委員接收轉運
赴京等語所辦甚好著傳諭鄭大進卽派委委員雇
辦車輛船隻預備接收迅速轉運送京並將應辦事
宜於陳輝祖到任時詳悉告知令其妥協辦理此旨
著由五百里發往至直隸接收轉運諸事並著周元
理循照向例速籌妥辦運至通州交倉場侍郎送京
以裕民食除就近傳知倉場侍郎舒常等並諭周元
理及畢沅知之欽此續據周元理咨明陝麥運京由
陝到豫由豫省委員雇覓船隻水運至通應照

二十七年並上年運京麥石成例聽豫省辦理
查豫省麥船入直至通沿河經過之大名元城
山東省之東昌曹州廣平府屬之清河縣由清
河至故城吳橋德州景州以抵通州雖有沿河
之經過州縣文武員弁護送但道路遙遠若非
專差無以資督護而昭慎重照例應委同知通
判各一員其撥船雇價聽豫省押運官員公平
給發抵通以後應聽倉場衙門接收辦理

一奉天運通黑豆由海入河轉運到通向例海

運責之奉天委員河運則歸之天津道縣如有
潮濕短少分別叅賠乾隆四十七年奉天頭二
兩運黑豆潮濕虧短六百八十餘石經倉場侍
郎查明係河運疎忽奏將潮濕虧短之豆著落
天津道縣照數賠補其餘豆石間有潮潤恐難
久貯請先行搭放天津道縣照不實力奉行例
各降二級調用天津委員馮維煥並不隨船照
管迨撥船抵壩後始由陸路往投文冊怠玩悞
公照溺職例革職又錦縣寧遠二州縣運通溢

額粟米二萬二千餘石行至柳縣凍阻亦由天津道縣裝載遲延所致責令該道縣賠辦車輛運交通倉如有斛收短少亦卽著落該道縣如數賠補

一乾隆四十七年十一月欽奉

諭旨李世傑奏到九月分糧價單內其黑豆一項市價自五錢起至八九錢不等價值尙屬平減目下京師黑豆價值頗昂較之豫省計增至一倍有餘現在積存京倉豆石發給官員等以平市價因思豫省黑豆

從前有採買運京者著傳諭該撫查照向例購買二三萬石由水路運送至京其作何籌辦之處仍著李世傑先行覆奏欽此嗣據河南巡撫奏明採買三萬石分爲兩運趕緊赴通所需買豆價值於地丁銀內動支其由城鎮市集買豆之處運抵水次及山水次運赴通州所需脚費照豫省章程每石每里水路給船價銀一毫陸路給車價銀一釐四毫在司庫節年耗羨及耗羨平餘銀內支給運員照例給盤費銀一錢督運之員跟役四

名分押之員跟役三名亦於耗羨項下酌撥

一乾隆五十一年奉

旨令奉天採買黑豆五萬石運通經

盛京將軍奏明各屬九月分豆價每石自七錢六分至九錢五分不等卽飭承德遼陽海城三州縣採買二萬八千石錦縣廣寧義州三州縣採買二萬二千石照歷年運通黑豆成例辦理所需豆價以及車價席片官役盤費等銀在地丁各項下撥用

一奉天採買二運豆二萬八千石內除海船遭
風沉沒二千二百五十石外其餘二萬五千七
百五十石裝運撥船一百三十五隻在呂家灣
東岳廟河干凍阻若令在船守凍難免潮濕攪
和偷竊等弊倉場侍郎奏明照三十九等年東
省黑豆粟米陸運到橋之例辦理至陸運車價
等項暫於通濟庫輕濟項下墊放著落天津道
縣賠交還款

乾隆五十二年

一奉省黑豆三萬一千八百八十石零由海運

通行至武清縣屬之木廠村凍阻若責令陸運
到橋道路遙遠且需車二三千輛輪轉運完已
屆冰泮不若就近賃房囤貯俟來春撥運抵通
倘有潮濕短少等弊責令天津道縣照數分賠

乾隆五

十二年

一豫東二省應徵粟米改徵黑豆十二萬石於
五十六年起運到通此後額豆充裕則前請採
買之豆七千二百石自當停止其大通橋官車
所需之豆卽於現在改徵之十二萬石豆內承

買所有豆價按照八旗五營官兵之例每石以

七錢二分五釐交價

乾隆五十五年

奉豆奉米

一奉天省并牛莊每年額徵黑豆共四萬餘石
分作三次裝赴運通貯倉備用

一奉天錦寧廣義四州縣額運黑豆一萬七千
餘石其中乾燥者固有而潮濕者亦多船身窄
小狹薄若令久貯在船轉恐滋弊乾隆四十一
年令其暫行堆貯號房加意風晾俟明歲冰泮
後再行查驗斛收轉運如有霉變短少著落天
津道縣賠補并行文直隸總督明歲接運奉豆

務須雇覓裝二三百石之大船迅速轉運押運
委員小心管押勿致稍有潮濕以及耽延時日
致船戶有守候之累

乾隆四
十一年

一嘉慶六年奉天省二運黑豆運抵天津水次
因楊村官民撥船轉運漕米銅鉛等項一時雇
募維艱且時已屆小雪恐中途凍阻奏明暫貯
天津於次年春融運通

一嘉慶七年

盛京將軍奏奉天旗民各倉撥米運通至嘉慶八

年該省解通粟米二十萬石所需船隻等項照
運通黑豆之例於地丁銀內動用報部覈銷又
前項米石到通後每船簸颺一袋約計共有糠
土一萬三千餘石奏明在於每月甲米內搭放
其轉運進倉腳價抗價銀兩仍准照例支給嗣
經查明委因節年久貯不免間有糠土係屬實
在情形奏奉

諭旨免其賠補仍將經管倉廩辦理不善各職名交部
議處欽此

一奉天省採買運京糧石自近海各州縣運至海船所有水陸運船等費由

盛京戶部動支海運船隻由直隸揀雇商船押赴奉省海口裝載運脚由直隸報銷嘉慶十一年

採買紅糧黑豆奏准均照舊章辦理紅糧

俗名高糧

性熱不耐久貯奏准改買粟米運京

一奉天錦縣運通豆石向於每年春間由城倉運至海口就近之馬蟻屯棧房囤貯候船裝運嘉慶十三年河水漲發將棧房囤貯豆石淹浸

此項豆石例應於七八月間津船到口裝運至
通所有被水浸溼霉變豆石一時驟難買補奏
准令該縣秋後賠補俟下年搭運

嘉慶十三年

一直隸天津雇船裝運奉天黑豆初運船隻定
限五月內到口二運船隻定限七月內到口地
方官於船隻到口之日會同運員限一個月裝
運出口嘉慶十四年初運船隻於九月二十二
日到齊十月初三日出口二運船隻於十月初
二日到齊十月十二日出口覈計運至天津已

屆冰凍之時奏奉

上諭溫承惠著傳旨申飭並著查取辦船遲誤之職名咨部議處以示懲儆等因欽此

一嘉慶十五年

盛京將軍富俊等奏請定奉省運通糧石分別責成一摺奉

上諭奉天運通糧石乾隆年間經倉場侍郎申保奏明海運則責之奉天委員河運則責之天津道縣嗣經直隸總督周元理奏改無庸天津道縣盤驗祇催令

原運之員押運交通原未免意存諉卸嗣後奉天運
通米石著責成奉天委員於領運時先行出具並無
潮溼短缺甘結方准起運抵津時飭令該管道縣按
船盤驗出結如有潮溼短缺卽著落奉天官員分別
著賠若該管道縣驗收出結以後其由津至通則責
成直隸委員小心轉運仍令奉天委員一同照料交
倉如再有前項情弊卽著落奉天委員及直隸道縣
委員一體分賠以昭覈實欽此

一嘉慶十八年奉省錦縣寧遠廣寧四州縣初

一二兩運豆石應直省撥運兵糈船隻不敷雇載
暫在北倉卸貯酌撥兵役防守俟來春轉運通
倉奉省委員飭令回任俟春融時由奉酌派委
官一二員來津協運

一道光五年戶部奏准籌備京倉粟米由奉省
採買據

盛京將軍奏准採買奉天粟米二十萬石在沿海
一帶及附近海口地方分投採買每石價銀不
得過二兩統計買米二十萬石約共需價銀四

十萬兩卽以

盛京戶部庫項內支領仍按照瀋陽市平發給所有應扣庫平升平袋計平餘盈餘等銀逐款扣出作爲運費如有不敷卽在參餘項下找領毋庸再動正款採買挽運完竣將用過銀兩照例題銷嗣據直督奏准自海運津自大沽海口至龍王廟水次及內河撥船水腳運費露囤等項銀兩在於司庫地糧並海稅盈餘項下撥給旋據倉場奏准照嘉慶十五年成案責成直隸及

奉天委員小心轉運毋庸派坐糧廳前赴天津
監兌仍俟撥運到通責令照例查驗兌收

一倉場奏准查驗奉省採買粟米內有潮溼米
九千二百二十三石風晾乾潔另廠收存先行

搭放

道光五年

一各倉粟米短絀黑豆充盈查照改徵成案由
各該省酌量通融奏明辦理旋據

盛京戶部委員經徵運通黑豆七千二百石內除
庄頭交納豆石礙難改徵將遼陽牛莊蓋州熊

岳四處旗地黑豆二千五百十九石九斗五升
二合四勺改徵粟米又查錦州府屬經徵黑豆
原議一半徵豆一半徵銀其徵豆者係以應徵
粟米一石折交黑豆二石共徵黑豆三萬一千
五百四十八石四斗五升九合七勺較原定徵
米數目加倍亦難改徵其徵銀者早經改徵黑
豆撥給莊頭喂養馬匹共黑豆一萬三千二百
四十三石九斗五升零今請將此項全數改徵
粟米於運通正豆內照數撥給莊頭喂養馬匹

統計改徵運通粟米一萬五千七百六十三石
九斗七合三勺一抄運通黑豆二萬二千九百
八十四石五斗五升二合三勺九抄自道光七

年秋後啟徵爲始

道光六年

一奉天運豆船隻無論頭運二通統限四月以
內到奉天海口如有遲延卽由奉天咨明直督
將怠玩船戶究辦承辦各員照例查參

道光六年

一奉天運通黑豆二萬一千一百九十三石零
撥船在土門樓甘水壩凍阻倉場以米豆日久

在船恐滋弊竇奏准照案陸運其車價經費飭
通永道先行籌墊事竣仍令天津道縣賠補繳

還

咸豐三年

一奉天鑲白旗界未完牛倉地米一百五十一
石零係領催德陞輒將米賣錢侵使嚴追抗違
不交送部間擬將侵使運通地米之已革領催
德陞照監守盜倉庫錢糧律擬杖一百流二千
里該犯解送奉天府府尹定地充配其所侵倉
糧經

盛京戶部飭令嚴追嗣因該犯家屬實係赤貧如
洗無項追賠戶部擬令比照州縣虧缺銀米分
成賠補例責令該管各官照數分賠搭運赴通

交納

咸豐九年

一奉省錦州府屬各廳州縣倉存粟米贏餘經
部奏請酌提二十萬石運京接濟所需船隻由
奉雇備運費等項令該將軍府尹等酌定報部
作正開銷其由津運通事宜責成天津道妥爲
經理嗣據該將軍奏稱奉省船隻未能遠涉大

洋請照舊章由直雇備等因節經部議雇備船隻海津運費由直籌辦陸路車腳鋪舵席藉等項由奉覈支奏准在案旋據直督將前項所需水腳等項查照成案在於鹽關道庫稅課項下動撥並以米二十萬石計之共需水腳等項銀四萬六千七百餘兩除由道庫及通商大臣長蘆運司籌撥外其不敷銀兩在於起徵海稅銀內湊撥應用復經冊開由海運津水腳每百石銷銀十四兩由津運通撥價每百石銷銀八兩

一錢又奉直兩省往返委員每員每日盤費銀
一錢飯食銀一錢車腳銀一兩跟役每名每日
盤費銀五分飯食銀五分統計支銷銀四萬六
千三百九十兩一錢戶部覈與該督前奏尙節
省銀三百餘兩應准開銷至奉省用過陸運車
腳運費等項共支銷銀三萬四千九百五十二
兩八錢七分二釐在於咸豐十一年同治元年

地丁餘地租項下動支

同治元年

一奉天錦縣義州同治九年運通米豆因裝兌

稍遲在糧棧寄囤驟遇大雨河水陡發致被淹
沒計錦縣囤棧沖失霉爛粟米一千三百八十
四石零黑豆二千一百七十六石零義州囤棧
沖失霉爛粟米五百三石零黑豆三千十八石
零奏經部議將該州縣交部議處所有沖淹霉
變粟豆照嘉慶十三年成案責令該州縣如數
賠補搭運續據

盛京將軍奏查明實係事出倉猝救護不遑懇將
該州縣寬免議處被沖米豆責成如數賠補同

治十二年奉

硃批著照所請該部知道欽此戶部議令由該將軍府

尹嚴飭該州縣將應賠沖失米豆趕緊賠補足
數隨同正運米石運津儻遲延不運或運不足

數仍將該州縣等奏叅議處

同治十一年

一奉天省運通米豆船隻向由直隸天津甯河
二縣雇備例限四月內齊抵奉天口岸奉省裝
兌於六七月間運通交納嗣因奉省應運錦甯
廣義四州縣額徵米豆及奉提未運旗倉粟米

共七萬餘石所需船隻遲至十月間始行抵口
該船戶等稟請駛島守凍俟來春冰泮裝運戶
部議令由直隸總督查明是否津甯二縣雇辦
遲延或押運委員沿途逗遛查究確實開具職
名送部照誤漕例嚴加議處並將督催不力之
天津道交部議處其奉省兌運事宜因船隻到
遲漫不加察率聽船戶守凍由

盛京將軍奉天府尹將承辦各州縣及押運委員
查取職名送部照例議處嗣後直省雇船務遵

例限抵口如逾限在一月以外將直隸承辦各員照例議處逾限在三月以外卽予嚴議儻船隻無誤而奉省米豆未能趕緊裝兌依限運通卽將奉省承辦各員從嚴叅辦

同治五年

一奉天省運通牛莊等處額徵米豆直省應雇船隻於八月下旬始行抵口覈與例限已逾數月天津甯河二縣辦理稽延照案由直隸總督查取職名送部議處至船隻抵口適當八月奉省承運米豆委員輒以船戶花名清冊未到爲

詞以致兌米稽遲船隻守凍由

盛京戶部奉天府尹查取各職名送部議處一俟

春融冰泮立即裝兌儻船戶到口延誤卽惟各

該員等是問

同治十二年

碾動薊穀

一豫省應運保雄兵米嘉慶十年因薊糧緩徵
不敷將支剩行糧等米同薊倉現存米石全數
湊運外尙有不敷在於安陽等縣存貯薊倉數
內按每穀一石碾運正米五斗三升以足額運
分別造入漕薊各奏銷案內報部覈銷

捐輸米石

戶部議准兩江總督璧昌等奏推廣捐輸米石章程呈交運收各事宜

一覈定米石價腳米以上等糙粳一律乾潔爲準作價二兩每石水腳銀四錢耗米八升折銀一錢六分由津運通撥船腳價食米折價每石銀一錢二分六釐四毫又預籌彌補折耗八升計銀一錢六分沙船犒賞席片等費每石銀五分三釐六毫捐生買米運赴上海遠近牽算每

石腳銀一錢通共每米一石准作庫平救銀三兩

一捐米運京應于上海局內揀派委員赴津會同地方官運抵通州交倉場驗收由倉場嚴飭坐糧廳實力稽查捐輸米石隨到隨收如經紀人等有勒捐諸弊卽由倉場嚴叅究辦至該委員如需雇用民船應聽其便仍由直隸總督嚴飭地方官毋許應雇船隻居奇擡價

一收呈覈數收米雇船應由蘇州藩司派員收

呈呈內將捐米若干石水腳等銀若干兩並年
貌三代出身履歷逐一開明查照部議章程覈
明所捐數目與所請官階銜級相符卽日送司
覆覈發給照票令赴上海局兌交銀米上海專
設一局遴委大員會同蘇松太道將正耗米石
水腳銀兩隨到隨收米用漕斛銀用庫平

一藩司衙門收呈上海道衙門收米責成該司
道等督同委員隨到隨辦不准稍有積壓亦不
准書役經手恣意需索違者書役重懲家丁人

等扶同舞弊一併究辦官亦從嚴叅辦

一官民捐輸米石必進倉方邀議敘若捐生所託非人難保不以低潮之米從中漁利應諭米商行棧等務以乾潔頂高售賣票上蓋用行商戳記呈交上海局備查並代雇船運赴上海免致中途偷漏攙和等弊其上海沙船則由局取具船行及船戶互保甘結仍照商人包運包交之成規飭取承認交倉保結存查

一近年洋面間有搶劫之案應責成蘇松狼山

兩鎮嚴飭外海水師各營先事防範並咨直隸山東檄沿海各營派撥勤幹員弁在于管轄洋面一體巡防

一漕船如有在洋遭風勘明實有傷人斫桅鬆艙形跡從寬免賠其折耗之米卽在捐輸每石豫備折耗米八升款內彌補其沙船到津米有短缺徵變者應以所餘耗米補足如尙不敷責令承攬之人並互保各船戶照數賠補

一招商運米准以二成帶貨惟上海帶赴天津

貨物無多似可變通帶米亦以二成爲率除將
捐輸米驗收外其帶運之米由官收買如有官
民隨任游幕在津准將此項米石呈買交倉請
獎

一江蘇沙船赴奉天牛莊等處販運豆石全借
南風之力故自正月至八月赴北洋之船最多
自九月至十二月赴北洋之船較少再六七月
天氣暑熱米色恐有微變應諭各省官民及時
捐輸若在春季夏初及秋季者皆可隨時裝運

若在六七月間必須入月運津九月以後必須
次年正月始可開行官民未必盡悉洋面情形
自應明白曉諭俾情殷報効者得以及時輸納
一捐輸米石經過關津請令各關監督驗明照
票一體免稅

一聚米之區多在蘇州泔墅關外該處土性宜
穀河道又與江北湖廣皆通米路甚寬上海紳
商販運米石多赴該處採買現辦捐米應曉諭
各省官民於省局具呈後就近赴關外辦米自

應聽從其便

一運米約計過萬石船須十隻由省局委員覈明捐呈內彙計有一萬石由藩司飭令捐戶定限十五日全運上海一面移知上海局照數雇船以免守候至上海局驗收米銀覈對司照並無短少卽由局給予執照不准遲延並由局填給米數照票帶赴天津呈驗一面將捐戶姓名出口日期開明清冊四本於米船放洋之前星馳詳報以憑驗收

一海運章程領運漕糧較多者給予職銜並由
外賞給匾額此次承運捐米必須揀擇板厚桅
堅之船以昭慎重其船隻較小專運米石數次
交倉無誤者應查出運次數酌予獎敘兩局委
員如果辦理妥善應俟著有成效酌覈請獎以
昭激勸

一坐糧廳驗收江蘇省捐米船戶夤夜使水經
倉場查明特參押運委員並勒限風晾分別賠
補並將撥船戶責成天津道嚴訊等因道光二

十七年七月十二日奉

上諭德誠等奏查出捐米使水請將押運委員摘去頂帶並議處一摺此項捐米到壩既據坐糧廳逐船查驗米色均屬乾潔乃該船戶人等膽敢夤夜使水攙和肆行朦混不法已極若不嚴行懲辦何以重積儲而示將來天津委員試用主簿唐成棣著先行摘去頂帶交部議處仍飭令督押該船戶逐船認真篩颺風涼儻不能一律乾潔除堪以收用外其所短米數著倉場侍郎查照舊案著落賠補所有撥船船戶著

訥爾經額責成天津道嚴訊作弊情形務須水落石
出按律懲辦斷不准稍有含混欽此嗣據倉場侍郎
德誠等奏前項捐米曬乾並賠補足數請開復
委員處分等因道光二十七年七月二十三日
奉

上諭德誠等奏捐米曬乾補足請開復委員處分一摺
前因捐米查有使水撓和情弊當經降旨將天津委
員試用主簿唐成棟摘去頂帶交部議處茲據該侍
郎等奏稱該員於被叅後趕緊風晾乾潔並於限內

買補足數尙知愧奮唐成棣前交部議處及摘去頂帶之處著准其開復餘著照所擬辦理該部知道欽此

一給事中呂賢基奏請江南捐輸米石改撥河南接濟災民經戶部議令商販運售捐輸米石除將載在江蘇清冊填入上海執照奏准收買之溢米驗係乾潔仍遵奏案照前收買運通外其各船交清正米之外所有不載清冊不入執照自行備帶之餘米卽由直隸總督出示曉諭

准由運河插檔行走運赴河南售賣至豫省收
買各事宜應由河南巡撫自行酌辦以上道光
二十七年
一道光三十年欽奉

上諭陸建瀛傳繩勛奏捐輸米石請查照原議仍由海
運津一摺此次江蘇省捐輸米石業經由海船運赴
天津著山東巡撫及沿海提鎮派委員弁妥爲護送
俟到津後著直隸總督飭天津道覈實驗收餘著照
所擬辦理該部知道欽此

兩江總督怡良等奏籌議捐輸米石章程

一捐米收呈委蘇州府在省設局凡捐生到局
呈捐由局查明所捐數目與所請官階銜級等
項相符卽日呈司覆覈批准由各捐生先將每
石應繳水腳經費等項紋銀一兩三錢內扣除
捐生自行運米支銷水腳銀一錢外實應繳銀
一兩二錢隨呈繳局解司由局發給印照令其
自行買米運赴劉河由婁局查照米數驗明兌
交沙船於照內註明某年月日收兌清楚加用
印記將原照交捐生齎赴省局呈請先給實收

聽候換照一面由婁局委員將收過銀米各數
開報省局查對捐生到局呈交銀米銀用庫平
米用漕斛凡捐交正米遇有升斗畸零概令補
交一石

一正米一石作銀二兩六錢三分七釐耗米一
斗作銀二錢六分三釐又預籌折耗八升作銀
二錢一分一釐沙船水腳等項作銀七錢三分
一釐四毫由津運通撥價銀一錢二分六釐四
毫捐生上兌盤運挑撥夫船員役薪糧等項作

銀二錢三分一釐二毫覈計每捐米一石共作銀四兩二錢其應給沙船水腳神福等項應查照蘇省歷辦成案給銀四錢五分三釐六毫捐生運米赴婁仍照案開銷銀一錢

一捐米議敘分別減成申算原減二成者准其再減一成每捐米一石合銀四兩二錢七折申算作銀六兩請獎原減四成者再減一成每石五折申算作銀八兩四錢請獎查照常例及籌餉事例分別覈明請獎別項捐輸不准援以爲

例

一此次捐米呈請虛銜

封典翎枝以及請加陞銜現有空白部照可以隨時
填給其捐請實用人員請查照籌餉成案先行
給與官階司印實收仍咨部頒照發蘇飭令倒
換所有奉頒空照如不敷用隨時請咨頒發以
備應用

一米之先熟者爲秬後熟者爲稷請循案秬稷
並捐並遵部議秬米價值每石酌加二成以一

石二斗抵作粳米一石務令一律乾圓堅潔不准低潮攙和一經沙船兌裝卽由該船戶出具承認交倉保結聲明實係乾潔好米並米數足額字樣分別咨送備查儻有藉詞米色故意留難者由局查明懲辦

一捐輸米石雇船運津道光二十七九兩年成案係由上海雇募沙船兌裝起運現在自應隨時蘇省漕糧卽在劉河口雇船裝載由海運津其驗收派兌一切事宜責成婁局委員妥爲經

理米到天津由直隸總督就近派委天津道督同委員驗收所有捐生交存由津運通撥價按數彙解天津交收由天津道雇備民船轉運赴通

一沙船裝運捐輸米石與正供無異應由婁局照案取具稅行船戶互保切結並銀米領狀存查仍令各按領運米數填給執照並每船各封樣米三分加貼印花令該船戶帶赴天津呈驗一面照案開造清冊轉咨直省驗收

一蘇省需餉浩繁前經通飭各屬勸捐協濟刻下各屬捐項尙未截數今旣辦捐米仍須與捐銀並行不悖庶軍餉倉儲兩無窒礙自應將前次捐銀之案先行截清數目並將所捐銀兩催繳解司一面曉諭各屬紳民今雖米捐並舉而銀捐仍不停止如前次捐銀之戶尙未請獎現復願捐米石准將銀米兩項歸併請獎如有已捐未繳或繳未足數者亦准其改繳米石銀米數目應分晰造冊報部毋得稍有牽混

一蘇省米捐甫經舉辦應寬以限期俾各捐生
得以陸續輸將源源運解如報捐在海運未竣
以前自可隨繳隨運卽隨同正漕赴津報捐在
海運已竣之後卽由婁局委員一手經理隨時
雇船裝兌仍俟收有萬石或數千石再行察看
風汛放洋如至八月以後尙未運竣卽將捐交
米石暫囤婁局統俟來歲新漕一體搭運

一商販聚米之區多在蘇州關外現辦捐米自
應曉諭各捐生於省局具呈繳銀後卽赴關外

金匱要略卷之三
三
辦米出局另給護照註明該捐生採買正耗米若干石所給護照限半月內繳銷凡經過關津准將照票呈驗免稅放行仍不准逾數多裝逾限漏稅如願在就近採買者亦聽其便

一捐正米一石連銀款並計共四兩二錢內提解部銀六分三釐查照大捐飯銀歸公之案將此項解部飯銀徑行提解部庫以爲京倉折放專款又每填部照一張提解照費銀二錢其餘外省書吏飯食紙張以及局員薪水一切公費

每捐米一石提給銀一錢所餘銀兩歸入預籌
折耗項下備海船遭風損失彌補之用如此次
捐輸米石全案平穩應將此項銀兩一併提解
部庫歸入折放項下應用

一隨收耗米一斗以八升作爲海船運津並督
運員弁沿途食米之需其餘二升飭令隨正交
倉

一海運漕糧並厯屆捐米案內准以八成運米
二成帶貨並准將運米較多之商及辦理妥善

各員酌予獎敘此次均應循案辦理

以上咸豐五年

一戶部奏准籌備京倉米石議令廣東省採買洋米數十萬石運京接濟旋據兩廣總督奏以辦運維艱請籌備米價銀四十萬兩運京採買經戶部奏令續籌米價銀四十萬兩分批運京計先後共合銀八十萬兩嗣據該督奏兩次籌捐京倉米價已捐洋銀七十五萬四千餘兩覈計捐至九成以上除已報解銀六十九萬兩其餘已捐未繳之款仍應設法催收儘數批解此

後欠捐之數勢難再加催督經戶部議准將籌

捐京倉米價截數停止

咸豐十年
同治元年

一同治元年戶部奏籌款由江蘇省購買商米
運京據江蘇巡撫將籌備情形奏明欽奉

上諭李鴻章奏籌備京米情形一摺前因戶部奏請籌
款由江蘇省購運商米以實倉儲當經諭令李鴻章
趕緊購買陸續運津茲據該撫奏稱現擬責成商人
分赴湖廣等處採辦並設局勸辦各等語江蘇省各
府縣產米不敷民食向賴湖廣等省商賈販運近來

米商斷絕採購維艱自係實情卽著照該撫所議責成商人分赴湖廣江北一帶採辦由該商承運赴津交兌著官文等查照遇有採辦京米商船過境其關稅釐捐概予寬免驗明有無應完他稅分別放行毋許留難以示體恤前諭李鴻章將革守俞斌罰款銀二十萬兩爲購買京米之用如有不敷於江海關洋稅項下湊撥現在該革員罰款旣難如數著追而江海關洋稅一項又屬入不敷出京倉關繫緊要自應設法接濟著照李鴻章所請迅卽勸諭商紳各富戶

無論粳和洋米或自行捐運或湊繳銀錢交商購運
儘捐儘解藉濟要需並著妥議章程設局勸辦不得
令經手各員從中舞弊該商紳等捐有巨款准其隨
時奏獎其湊捐各散戶並准其彙案分別咨部覈辦
等因欽此旋據江蘇巡撫李鴻章議定籌辦米
捐章程及分別請獎各條查照海運成案辦理
據該商董等收買粳和洋米三萬石運津兌收
復據續行勸捐米六萬石共計捐輸米九萬石
分作三批雇裝沙衛船隻陸續放洋北上